

四庫全書

集部

欽定四庫全書

集部

會稽掇英總集卷十一

詳校官中書臣張經田

助教臣常循覆勘

總校官庶吉士臣倉聖脉

校對官中書臣田尹衡

謄錄監生臣馮堪

欽定四庫全書

會稽掇英總集卷九

宋 孔延之 撰

雜寺觀律詩

昌安寺

李紳

寺深松桂無塵事地接荒郊帶夕陽啼鳥歇時山寂寂
野花殘處月蒼蒼碧紗凝焰開金像清梵消聲聞竹房
丘壠漸平連茂草九原何處不心傷

龍宮寺 井序

此寺摧毀積歲正元十八年余為布衣東遊天台故人
江西觀察使崔公以殿中謫官移治剡溪崔公座中有
僧曰修真自言居龍宮寺起謂余言異日必當鎮此為
修此寺時以為狂易之言不之應僧相視久之而退至
元和三年余以前進士為故薛平常侍招至越中此僧
已卧疾使門人相告曩日所言必當鎮此修寺之記幸
不見忘僧偶言寺有靈祇相告爾予問疾而已不能對

及後符其言而詢其存沒則僧及門人悉殂謝寺更頽
毀唯荒墟餘拱而已因召寺僧會真以俸錢為葺之累
月而畢以成其往願也

銀地溪邊遇衲師笑將花雨指潛知定觀玄度生前事
不道靈山別後期真相有無因色界化城興滅在蓮基
好令滄海龍宮子長護金人舊浴池

龜山寺魚池

此池微之所修戒其僧以護生之意及公垂至見其詩而笑之未幾

寺之僧果有苦於池中元禎者公垂因形於詩云

勸汝諸僧好護持不須垂釣引青絲
雲山莫厭看經坐便是浮生得道時

同前

李紳

汲水添池活白蓮十千鬢鬣盡生天
凡庸不識慈悲意自葬江魚入九泉

題寶相寺

孟浩然

石壁開金像香山倚鐵圍下生彌勒見迴向
一心歸松竹前庭古樓臺世界稀多嵐增氣色
餘照發寒輝講席

邀譚柄泉堂施浴衣願垂功德水從此濯塵機

同前

僧南粵

松徑行纔盡香城絕世塵倚巖開半殿鑿石見全身鐘
鼓中天曉煙花上界春出門重稽首願值下生晨

宿天柱觀

僧靈一

石室初投宿仙翁喜暫容花源隔水見洞府過山逢泉
涌階前地雲生戶外峯中宵自入定非是欲降龍

龍瑞宮

禹穴也三十六洞天之第十一曰陽明洞天大禹探
書治水之所唐神龍中置懷仙館開元中勅方士葉
天師設醮而龍見因改今額

春分日投簡陽明洞天作

元稹

中分春一半今日半春徂老惜光陰甚慵牽興緒孤偶
因投秘簡聊得泛平湖郡邑移仙界山川展畫圖旌旗
遮嶼浦士女滿闈闔似木吳兒勁如花越妓妹牛儂驚
力直蠶妾笑睂眄怪我攜章甫嘲人託鷓鴣閭閻隨地

勝風俗與華殊
跣足沿流婦丫頭
避役奴雕題雖少
有雞卜尚多巫鄉
味尤珍蛤家神愛
事烏舟船通海嶠
田種繞城隅櫛比
千艘合袞袞萬頃
鋪芟茶闌小市漁
火隔溪蘆日脚斜
穿浪雲根遠曳蒲
欵風花氣度新雨
草芽蘇粉壞梅辭
萼紅含杏綴珠疇
餘秧漸長燒後封
猶枯綠綆高懸柳
青錢密辦榆馴鷗
眠淺瀨驚雉迸平
蕪水淨王餘見山
空謝豹呼燕狂捎
蛺蝶螟挂集蒲蘆
滅碧鶴新卵深黃
鶯嫩雛村扉開白
版寺壁耀頰糊禹
廟

纔離郭陳莊恰半途石帆何峭嶢龍瑞本縈紆穴為探
符坼潭因失箭剜隄形彎熨斗峰勢踴香鑪幢蓋迎三
洞煙霞貯一壺桃枝蠟復直桑樹亞還扶鼈解稱從事
松堪作大夫榮光飄殿閣虛籟合笙竽庭狎仙翁麋池
游縣令鳧冥心除健羨扣寂入虛無岡踏翻星紀章飛
動帝樞東皇提白日北斗下玄都騎吏裙皆紫科車慙
盡朱地侯鞭社伯海若跨天吳霧噴雷公怒煙揚竈鬼
趨投壺憐玉女喫飯笑麻姑菓實經千歲衣裳重六銖

瓊盃傳素液，金匕進雕胡。掌裏承來露，杯中釣得鱸。茵
生悲局促，柯爛覺須臾。稊米休言聖，醯雞益伏愚。鼓鼙
催暝色，簪組縛微軀。遂別真徒侶，還來出路衢。題詩歎
城郭，揮手謝妻孥。幸有桃源近，全家肯去無。

和白居易

青春行已半，白日坐將徂。越國強仍大，稽城高且孤。利

饒鹽煮海名，勝鏡澄湖斗。天垂象台明，地展圖

天台
四明

二山
名

瓌奇闐市井，佳麗溢閨閣。句踐遺風霸，西施舊俗

妹船頭龍天矯橋脚獸眇鄉味珍彭越時鮮貴鷓鴣
語言諸夏異衣服一方殊擣練蛾眉婢鳴榔了角奴江
清敵伊洛山翠勝荆巫華表雙栖鶴聯牆幾點烏煙波
分渡口雲樹接城隅澗遠松如畫洲平葑似鋪綠鍼秧
早稻紫笋折新蘆暖蹋泥中藕香尋石上蒲雨來萌盡
達雷後蟄全蘇柳眼黃絲類花房紅蠟珠林風新竹折
野燒老桑枯帶彈長條蕙錢穿短貫榆喧和生野菜卑
濕長街蕪女浣紗相伴兒烹鯉一呼山魈啼雉子林狎

掛都盧產業論蠶蟻孳生計鴨雛泉巖雪飄灑苔壁錦
漫糊堰限舟航路堤通車馬途耶谿岸迴合禹廟逕盤
紆洞穴何因鑿星槎誰與刻石凹仙藥白峯峭佛香鑪
去為投金簡來因挈玉壺貴仍招客宿健未要人扶聞
望賢丞相儀形美大夫前驅駐旌旆偏座列笙竽刺史
旗翻隼尚書履曳鳧學禪超後有觀妙造虛無髻裏傳
僧寶環中得道樞登樓詩八詠置硯賦三都捧擁羅將
綺趨蹌紫與朱廟謀藏稷高兵略貯孫吳令下三軍整

風高四海趨千家得慈母六郡事嚴姑重士過三哺輕

財抵一銖

婆沙論云他化自在天衣重一銖

送航歌宛轉嘲妓笑盧胡

佐飲時魚鼈蠲醒數鱸醉鄉雖咫尺樂事亦須臾若不中賢聖何由外智愚伊余一生志俄爾百年軀江上三千里城中十二衢出多無伴侶歸只對妻孥白首青山約抽身去得無

天華寺

呂夷簡

賀家湖上天華寺一一軒窻向水開不用閉門防俗客

愛閒能有幾人來

留題寶相寺

章得象

天台四面翠如屏，洞穴幽奇地最靈。百尺巖中真像在

千年澗畔古松青，路傍斷石留神迹。

路傍斷石如刀鋸，割截之狀傳云昔

造佛者試鋸之，今謂之鋸解峯是也。

壁上遺文缺舊銘。

建寺碑文乃劉勰所撰，今壞缺不存。

但寫之屋壁字已訛矣。

我是丹丘仙，郡守暫來猶似覺魂醒。

同前

陳堯佐

白雲樓殿翠林間，終日軒窓四面山。却愧勞生多事客

清涼分得片時間

題翠峯院

范仲淹

翠峯高與白雲間
吾祖曾居水石間
千載家風應未墜
子孫還解愛青山

題溪口廣慈寺

越中山水絕纖塵
溪口風光步步新
求取會稽藏拙去
白雲深處亦行春

同前

葉清臣

雲中江樹冷蕭蕭
溪上僧歸倚畫橈
誰為秋風乘興去
松窓先聽富陽潮

同前 錢彥遠

寺跨長溪山四回
杉松微徑盡莓苔
門前潮上不須看
常恐塵埃隨水來

同前 元絳

雲外軒窓切斗牛
脩然三伏亦生秋
青山屈曲無重數
俱東溪光款款流

書用師庵

李昭述

架泉龕石構幽棲竹樹陰森鏤翠微珍重支郎得高趣
一庵一榻自忘機

戒珠寺上方

蘇舜欽

躋攀出上楹壘勢與雲平日暮蒼煙合秋來遠水明幽
軒開極望疎磬落餘清便有飛騰意俄嗟俗慮縈

大禹寺

鑑湖盡處衆峰前古寺蕭疎水石間殿閣北垂連禹廟

松筠東去入稽山坐中巖鳥自上下吟久礫雲時往還
我厭區區走名宦未能來此一生閒

題妙喜庵

并序

蔣堂

閔公者越之大士也今年秋於鑑湖中得有唐妙喜寺
遺址結茅而居昔刺史李遜作記云雲霞草樹橫在一
目即其地也予嘉之乃以寺之昔名名其庵復贊道行
形于鄙句云

禪公覽古意徘徊偶結雲庵向北來滿目滄洲圍野景

一枝金策卓秋苔沙邊水鳥銜花至月下漁人施供迴
或訪稽山舊徒侶樵風應為送浮杯

九日叢山戒珠寺戲呈僚友

張伯玉

秦望山前曉鴈斜叢山雲外看黃花誰能蒂芥關心緒
且插茱萸伴物華歲計簿書寧有盡日生公事了無涯
樽前況有兵厨酒不待兵厨酒亦賒

書大禹寺壁

蕭寺禹祠傍人間白日長諷經聞海穴洗鉢動湖光臺

殿留風月煙雲起棟梁遊人晚回首松竹自蒼蒼

遊戒珠寺

趙誠

欲遊城郭應難遍每訪湖山亦自勞坐致眼前無限景
僧房寄處巖峰高

留題崇法院

丁寶臣

瀕湖三寺倚崢嶸梵剎相高對縣城樓殿盡知隨處盛
山林獨愛此中清翦開水末簷牙出鑿破巖腰磴道成
悟得祖師心印法禪僧遙指塔燈明

題天姥院

王琬

十里松篁結晝陰，倚空山翠亂花鍼。
瓊臺瑤瑟中天過，碧洞蒼龍午夜吟。
石磴雨乾泉駐玉，觚棱雲斷月移金。
桃花流水年年事，誰免浮生白髮侵。

遊龍瑞觀

楊侃

泛舟秋水一湖平，入觀松風數里清。
丹井有泉仙跡在，玉書藏穴禹功成。
步虛夜月千峰靜，投簡春霖萬壑盈。
述記賀知章手筆，題詩元相國聲名。
結廬野客前谿住。

採朮幽人絕頂行
杉檜影侵山殿冷
星辰光逼醮壇明
降仙臺畔看雲過
射的潭邊聽鶴鳴
樵客多聞逢異事
洞天都不遠
重城林間窻
戶塵難到衣上煙
嵐暮自生
不待照湖天子賜
欲將長往換浮榮

遊梅山寺

出郭塵路斷
登舟鷺嶺通
樓臺花嶼上
鐘梵水天中
石磴斑春蘚
松門韻晚風
萼絲惹輕檝
雲錦散瑤空
竹逕連茶塢
山亭對藥叢
却輸湖畔叟
朝夕訪支公

過溪口廣慈院

刁約

賞徧林泉去未能却來溪口訪巖僧為觀遠景尤奇處
更陟危亭最上層雲吐前峰疑霈雨泉飛別澗旋凝冰
陋客憔悴煩躬筆待結錢唐九老朋

同前

吳處厚

數日高陪使騎行青山好處屢逢僧坐禪庵遠雲為屋
會景亭高石作層

會景院
中亭名

大旆晚穿松壑霧瘦筇寒卓

瀑泉冰此遊不減白蓮社慧遠宗雷共一朋

同前

僧顯忠

五馬重來谿口寺，惟將屬吏與門僧。
盤雲野徑行千里，送目危臺上百層。
巖檜影寒猶帶雪，谿流聲澀未銷冰。
尋常地遠無因到，空愧躬良二老朋。

遊梅山寺

僧仲休

世續香燈演聖言，再新華構稱凭軒。
陰陰松色連僧閣，颺颺波聲入寺門。
飛鷺銜魚離淺瀨，殘雲帶雨渡遙村。
沃洲相較應相近，樹杪啼煙祇欠猿。

南明山寶相寺十五題

古律詩
并序

僧顯忠

南明山者即齊僧護所隱石城也護始到夜聞鐘磬仙樂之音時時現佛形象煒煜而可駭護繇是發私誠願鑿百尺彌勒像凡歷三生乃就其事則實乎本傳因而始剏精藍泐續香火至唐季廣明初經回祿前後締構數四及武肅偏霸樹閣三層至今在焉予今年秋受命尸于此以十方人為叢林居率從公也惜其東南之勝勢此亦一焉而未見好事者與鬯發然欲其名之遠非

歌詠不能伸之暇日因歷訪其可尚得境物命為一十
五題雜而賦之况前代未有作之者雖不足夸大亦庶
幾以自適爾時嘉祐五年歲次庚子仲冬月十有八日
碧齋序

三生像

勝域將垂迹先聞鐘梵聲術施猶未降宣老已三生山
接天門嶮巖開月殿明善財何處去樓閣自崢嶸

三層閣

像身高百尺閣道聳三層欲得親瞻向還須最上登煙
霞封寶城星斗掛觚稜已自甘香火人間去不能

隱岳巖

融結自何時曾為幾陵谷不見昔賢蹤空遺此巖腹一
徑斲煙蓐千里老雲木尋常人到稀虎豹暗棲宿

石城山

谿盡見石城寺在石城裏崖缺露遙村門開對寒水况
非雉堞成無以金湯比梵衆此安棲俗駕來有幾

白雲莊

堪愛仙莊近翠岑杖藜時得去遊尋牛羊數點煙雲遠
雞犬一聲桑柘深高下間田如布局東西流水若鳴琴
更聽野老談農事忘却人間萬種心

夾谿塘

南谿北谿深橫塘截流過清影照人寒澄耀分鑑破沙
明鷗鷺馴草密牛羊卧不見直鉤翁狂歌遣誰和

柔亭

孤亭枕長谿谿光照庭檻無人弄潺湲終日對平淡猿
鳥去難呼藤蘿垂可擘薄暮衆山昏霜風起葭莢

石狻猊

亭除兩狻猊一仰復一俯告天與叩地似欲訴憂苦世
傳智顛死二獸來瞻覩逡巡化為石埋沒在深土事怪
固難詰但見形可取風雨駁蒼苔萬古萬萬古

齊相井

南明山足勢欲盡正是新崖東脇隈不知泉自那峰出

皆謂井因齊相開甘滑堪預酈經載淵渟疑俟桑苧來
神蛟往往此潛蟄旱歲莫測生風雷

齊相書堂

唐齊相顓
曾隱于此

異代終難問遺名不可窮山中丞相去林下學堂空映
雪功休比冲天志莫同故基蘭蕙滿猶自起華風

白蓮庵

誰將白蓮子固向峰頂栽非學遠公社兼無陶令來去
世迹何曠誅茅心已灰不知歲月改但見此花開

石縫梅

根埋山骨幾百載但怪生物偏有私春前受氣地猶冷
雪裏暗開人未知自將孤石比堅性不與衆木爭芳姿
惆悵無言為真賞欄杆獨倚覺多時

鋸解峯

其峯中裂
狀若鋸解

蒼山巍不倚中裂勢難圖始鑄陰陽鋸誰開造化爐藤
搖疑落屑樹折若分符漏出飛泉影長垂一帶孤

仙髻峯

首出衆峯間盤龍勢孤聳雲映鬢光浮月生梳影動可
握謂新沐未巾疑乍攏幸免且斯理誰復慙種種

白鷗塢

朝看白鷗從塢出暮看白鷗從塢歸森森綠樹兩峯下
片片白雲迎日飛因知野性戀山谷咫尺之間還見稀

古詩

遊沈道士金庭館

沈約

秦皇御宇宙漢帝恢武功懽娛人事盡情性猶未充銳

意三山上託慕九霄中既表祈年觀復立望仙宮寧為
心好道直由意無窮曰余知止足是願不須豐山嶂遠
重疊竹樹近蒙籠開襟濯寒水解帶臨清風所累非外
物為念在玄空朋來握石體賓至駕輕鴻都令人徑絕
唯使雲路通一舉凌倒景無事適華嵩寄言賞心客歲
暮爾來同

宿南巖寺感興

齊顛

南巖寺本滄海任子釣臺今尚在見說垂鈎於此中搗

牛作餌莊書載滄海竭任子歿波濤打處為巖窟不知
任子何所之唯見釣臺空峻岼

遊大禹寺迴馬上口占

張伯玉

永日躋雲峰向晚下秋嶽却望碧城中樓臺翠煙滿前
旌擁歸騎緩轡徐馭穩曠望寫予心平波海天遠顧予
疇昔志本以鋤犁挽敢望麋鹿資邁此雲龍旦金門容
竊步玉殿叨靈睭某為先帝御史
時登殿啓事復此千騎來日逐紛
華戰平生知退意長畏歲月晚行當引初服還把芟荷

金
卷八
一
翦

初冬同晤賢二師登映發亭望會稽

楊蟠

我有二林侶相邀步寒日超然人外遊下見衆山出木
葉落已靜乾坤久蕭瑟浮雲當空翻慘慘百鳥沒欲辨
越中岸青煙易為失山川何寂寥宮闕猶髣髴誰是古
來者念之難再述功名遂塵埃豈復有其骨今我二三
子永為傲時物篇章逢太平窈窕坐天末生理本無固
願言從此畢登臨望前人事事安敢忽

會稽掇英總集卷九

欽定四庫全書

會稽掇英總集卷十

宋 孔延之 撰

送別律詩

聽盛小叢歌贈崔侍御

并序

李尚書夜登越城樓聞歌曰鴈門山上鴈初飛其聲激
切召至曰去籍之妓盛小叢也曰汝歌何善乎曰小叢
是黎園供奉南不嫌女甥也所唱之音乃不嫌之授也

今老且廢矣時察院崔侍御自府幕而拜李公連夕餞
崔君於鏡湖之光候亭屢命小叢歌餞在座各為賦一
絕句贈送之亞相為之首唱崔下句云獨向柏臺為老
吏皆曰侍御鳳閣中書即其程也何以老於柏臺衆請
改之崔曰某但止於此任寧望九遷乎是年秋崔君鞫
獄於譙中而終

詩李訥

繡衣奔命去情多南國佳人斂翠蛾曾向教坊聽國樂

為君重唱盛叢歌

奉和

崔元範

羊公留宴峴山亭
洛浦高歌五夜情
獨向柏臺為老吏
可憐林木響餘聲

同前

楊知至

燕趙能歌有幾人
落花迴雪似含嚔
聲隨御史西歸去
誰伴文翁怨九春

同前

封彥冲

蓮府纔為淶水賓，忽乘驄馬入咸秦。
為君唱作西河調，日暮偏傷去住人。

同前 盧鄴

何郎戴豸別賢侯，更吐歌珠宴庾樓。
莫道江南不同醉，即陪舟楫上京遊。

同前 高湘

謝安春渚餞袁宏，千里仁風一扇清。
歌黛慘時方酌酎，不知公子重飛觥。

同前 盧澂

烏臺上客紫髯公共捧天書靜鏡中桃葉不須歌白苧
耶溪暮雨起樵風

送越客

張籍

見說孤帆去東南別會稽春雲剡溪口殘月鏡湖西水
鶴沙邊立山艫竹裏啼謝家曾住處煙洞入應迷

送朱慶餘及第歸越

東南歸路遠幾日到鄉中有寺山皆徧無家水不通湖

聲連葉雨野氣稻花風州縣知名久爭邀與客同

送李評事遊越

未習風塵事初為吳越遊
露沾湖草晚日照海山
秋梅市門何在蘭亭水尚留
西陵待潮處知汝不勝愁

送友人遊越

杜荀鶴

去越從吳過吳疆與越連
有園多種橘無水不生蓮
夜市橋邊火春風寺外船
此中偏重客君去必經年

送浙東李僕射赴鎮

劉禹錫

建節東行是舊遊，歡聲喜氣滿吳州。
郡人重得黃丞相，童子爭迎郭細侯。
詔下初辭溫室樹，夢中先到景陽樓。
自憐不識平津閣，遙望旌旗汝水頭。

送元曉上人歸稽亭

重疊稽亭路，山僧歸獨行。
遠峯斜日影，本寺舊鐘聲。
徒侶問新事，煙雲含別情。
應誇乞食處，蹋遍鳳皇城。

送元簡上人適越

孤雲出岫本無依，勝景名山即是歸。
久向吳門遊好寺，

還思越水洗塵機
浙江濤驚獅子吼
稽嶺峰疑靈鷲飛
更入天台石橋路
垂珠璀璨拂三衣

越中送王使君赴江華

崔峒

皂蓋春風自越谿
獨尋芳草桂陽西
遠水浮雲隨馬去
空山弱篠向雲低
遙知異政荆門北
舊許新詩康樂齊
萬里相思在何處
九疑殘雪白猿啼

送王協律遊杭越十韻

元稹

去去莫淒淒
餘杭接會稽
松門天竺寺
花洞若耶溪
浣

渚逢新豔蘭亭試舊題山經秦帝望壘辨越王棲江樹
春常早城樓月易低鏡呈湖面出雲疊海潮齊章甫官
人戴萼絲姹女提長竿迎客鬧小市隔煙迷紙亂紅藍
歷甌凝碧玉泥荆南無底物來日為儂攜

送王十一遊浙中

越州都在浙河灣塵土消沉境象間百里油盆鏡湖水
千峯翠朶會稽山軍城樓閣隨高下禹廟煙霞自往還
想得閒吟乘畫舸幾迴明月墜雲間

送人之江東

劉商

含香仍佩玉宜入鏡中行盡室隨乘興扁舟不計程渡
江霖雨霽對月夜潮生莫慮當炎暑稽山水木清

送裴饒歸會稽

羅隱

金庭路指剡川隈珍重良朋自此來兩鬢不堪悲歲月
一卮猶得話塵埃家道曩分心空在世逼橫流眼未開
笑殺山陰雪中客等閒乘興又須迴

遙知元九送王行周遊越

李紳

江潮隨月盈還縮沙渚依潮斷更連伍相廟中多白浪
越王臺畔少晴煙低頭綠草羞枚乘刺眼紅花哭杜鵑
莫倚西施舊苔石由來破國是神仙

送友人尋越中山水

李白

聞道稽山去偏宜謝客才千巖泉灑落萬壑樹縈迴東
海橫秦望西陵拱越臺湖清霜鏡曉濤白雪山來八月
枚乘筆三吳張翰盃此中多逸興早晚向天台

送朱山人歸山陰別業

劉長卿

越中初罷戰江上送歸橈南度無來客西陵自落潮空
城垂故柳舊業廢春苗閭里相逢少鶯花共寂寥

送張司馬罷使適越

時危身赴敵事往任浮沉末路三江去當時百戰心春
風吳苑綠古木剡山深千里滄波上孤舟不可尋

送李校書適越謁杜中丞

江風處處盡旦暮水空波搖落行人去雲山向越多陳
蕃懸榻待謝客枉帆過相見耶谿路逶迤入薜蘿

送荀八過山陰兼寄剡中諸官

訪舊山陰縣扁舟到海涯故林嗟滿歲春草憶佳期晚
景千峰亂晴江一鳥遲桂香留客處楓暗泊舟時舊石
曹娥篆空山夏禹祠剡溪多隱吏君去道相思

送嚴維尉諸暨

愛爾文章遠還家印綬榮退公魚色養臨下帶鄉情喬
木映官舍春山宜縣城應憐釣臺石間却為浮名

送崔士先適越

山陰好雲物此去又春風越鳥聞花裏曹娥想鏡中小
江潮易滿萬井水皆通徒羨扁舟客微官事不同

送宣武從事越中按獄

陸龜蒙

曉看呈使範知欲救星軺水國難驅傳山城便倚橈秉
籌先獨立持法稱高標旌旆臨危堞金絲發麗譙別愁
當翠窻望隔風潮木落孤帆迴江寒疊鼓飄客鴻吳
島盡殘雪剡汀銷坐想休秦獄春應到柳條

却渡西陵別越中父老

李紳

海潮晚上江風急津吏篙師語默齊
傾首奉觴看故老
擁流爭拜見孩提慙非杜母臨襄岷
自鄙朱公別會稽
漸舉雲帆煙水濶杳然鳧雁各東西

南徐送丘侍御之越

皇甫冉

時鳥催春色離人惜歲華
遠山隨擁傳芳草引還家
北固潮當濶西陵路漸賒
縱令寒食過猶有鏡中花

送薛判官之越

時難自多務職小亦求賢
道路無辭遠雲山併在前
樟

亭待潮處已見起人煙

越中送新安張少府歸秦中

孟浩然

試登秦望望秦川
遙憶青門春可憐
仲月送君從此去
他時須及邵平田

送韋繇校書赴浙東幕

朱餘慶

丞相辟書新清關
獨去人官離芸閣
早名占甲科頻水
驛迎船火山城候
騎塵湖邊寄家去
到日倍榮親

送周元範赴越

賈島

原下相逢便別離，蟬鳴關路使迴時。
過淮漸有懸帆興，到越應將墜葉期。
城上秋山生菊早，驛西寒渡落潮遲。
已曾幾徧隨旌旆，去謁荒郊大禹祠。

送朱可久歸越中

石頭城下泊，北固暝鐘初。
汀鷺潮衝起，舟窓月過虛。
吳山侵越衆，隋柳入唐疎。
自欲躬調膳，辟來何府書。

送人適越

高城滿夕陽，何事欲霓裳。
遷客蓬蒿暮，遊人道路長。
晴

湖勝鏡碧寒柳似金黃若有相思夢殷勤載八行

送朱兵曹迴越

星彩練中見澄江豈有泥潮生垂釣罷楚盡去橋西磧
鳥辭沙至山颯隔水啼會稽半侵海濤白禹祠溪

送陸侍御入湖山

陳羽

鶴唳天邊秋水空荻花蘆葉起西風今夜渡江何處宿
會稽山在月明中

送餘姚知縣張太博

王隨

才名登仕路芝綉奉龍光出宰神仙邑吟辭鷓鷯行煙
波迎去掉圖籍富行裝淮月蕪葭影江風橘柚香新詩
留禹穴舊里過錢塘市井魚鹽聚亭臺水石涼雲山接
秦望花木勝河陽暫布惠和政即看鵬翼翔

送謝績知餘姚

歐陽修

滁南幽谷抱山斜我鑿清泉子種花故事留傳遺老說
世人今作畫圖誇金閨引籍子方壯白髮盈簪我可嗟
試問絃歌為縣政何如樽俎樂無涯

其二

喜聞嘉譽藹淮壖
又送吳帆解畫船
壠畝遺民談舊政
江山餘思入新篇
憂傷白髮吾今爾
仕宦青雲子勉旃
舉棹南風吹酒醒
離傷莫惜更留連

會稽掇英總集卷十

欽定四庫全書

會稽掇英總集卷十一

宋 孔延之 撰

送別律詩

送妙明規長老

王隨

振衣辭帝里歸路指禪林勝絕江山寺
澄明水月心卸帆煙浦近鳴磬夜船深
到喜清涼境門開松桂陰

送高學士知越

薛映

晉朝名理漢循良胡粉官闈紫界牆得請仍辭史官筆
憶歸重換會稽章間尋嶽寺茶香細盛會江樓繪縷長
官是秋曹俱老大異時同約棹滄浪

同前 錢惟演

粉署為郎鬢雪侵酒酣風駛惜分襟雲迷水館春旗潤
樹繞山城暝角深下擔桂鈎傳密意渡江桃葉聽遺音
孤鶯啼罷芳心歇倦翼因君憶故林

同前 楊億

萬壑千巖古剎中錦旌朱轂此臨戎酒厨歲取公田秣
樵舸朝分射的風閣吏蒸青藏史牘席賓簪玳奉談叢
海邦訟息多幽賞禹穴奇書為一空

同前

張士遜

著撰煩鴻筆均勞利建侯僧隨天際棹郡冠浙東州山
影四明接溪聲萬壑流
顧長康云萬壑爭流謝家風月在公外稱
冥搜

同前

劉筠

浩蕩辭波潤鼠鬚風流談柄藹楫櫓漢臺厭卧郎官錦
禹穴思探上世書鶴蓋成陰爭出錢鷗絃促調歎離居
由來方任推名輩藻思江山助起予

同前

陳知微

會稽新命剖魚符又向蓬山鑠直廬林壑縈迴多洞府
人煙高下半樓居知音好採柯亭竹博物應探禹穴書
公暇仙舟宜按部鑑湖晴色照鄉閭

送餘姚知縣陳最寺丞

龐籍

需頭章薦重方底詔除榮人比鳴琴令官參夢馬卿菰
煙吳地景濤鷺浙江程美政應先報姚虞舊俗清

同前 鄭哉

美渥卿為佐清談縣得才人從日邊別舟渡鑑中來食
案資鮭稟公田剩酒材秋餘一憑檻江海遍樓臺

同前 歐陽修

銅墨佩腰間中流望若仙鳴蟬汴河柳畫鷁越鄉舫下
瀨逢江鴈瞻氛落海鳶山川仍客思盡入隱侯篇

同前

葉清臣

白見恩初渥新遊刃久虛官曹鵲樹下民版象耕餘山
迴人逢麂江清客厭魚送君多悵望雲外是親居

同前

謝絳

稍過山陰接甬東正當兩國畫屏中巖巔僧井通江水
門外商帆落海風盡日揮絃無一事平時推轂有諸公
此行絕勝人人羨莫恨猶懷五兩銅

其二

愧君來款關話別憩林間不待風銷暑聊因酒發顏滄
洲即欲往清躅暫容攀居者羨行者寄聲思越山

同前

梅堯臣

試邑來勾越風煙復上游江潮自迎客山月亦隨舟海
貨通閭市漁歌入縣樓絃琴無外事坐見浦帆收

送大理徐寺丞知諸暨

楊億

子山辭賦動南朝近佐名卿掌玉條治邑還持麈尾柄
攜家便泛木蘭橈謝塘春晝偏多思潘鬢秋風苦未凋

種秫公田供醕酌彈琴官舍助逍遙去程千里隨賓鴈
宿館三更聽落潮聞道臨安有仙穴莫拋印綬採芝苗
送李中舍罷蕭山赴闕

吏隱江東五六年歸時猶戀好山川野僧送別攜詩句
瘦馬臨岐當酒錢吳苑醉逢梅弄雪隋堤吟見柳垂烟
自言更共秋濤約未捨西興一釣船

送僧歸越

舊房稽嶺鐔春苔猿鳥歡迎振錫迴花雨六時飄講席

樵風千里送浮杯
一乘了義剗心學
三藏真文盪手開
跡似孤雲本無滯
飄飄新到帝鄉來

送張待制知越

胡宿

長安廡吏馭花驄
竹使遙分澗水東
遠勢蚤推賢相子

太傅三當國柄
公常遠嫌避事

任誠真有古人風
稽山一鎮君封內

四鎮

之山會稽其一

阿閣三休聳禁中
長樂鐘聲偏怨別
何時同謁

建章宮

同前

李昭述

嚴近厭承明東南抗使旌箕裘漢相子屏翰越王城勝
槩須留賞仙舟莫計程湖光八百里風月有餘清

同前

梅堯臣

滄海東邊會稽郡朱輪遠下相臣家已同雲漢星辰轉
不與鑑湖風月賒越箭抽萌供美如秦山堆翠照高牙
買臣嚴助前時貴破盜論功未足誇

送張行之越

蘇舜欽

五雲寺下石橋邊六月溪風灑面寒今正炎天君獨往

松間尋我舊題看

送則師歸越

石延年

歸里圓心復苦形
生涯梭笠伴銅鉞
魚隨洗鉢衝遺粒
龍倚移舟識諷經
佛廟春遊湖樹暗
神濤晴渡越峯青
高才不獨江山助
王謝風流舊有靈

送鄭十學士通理越州

宸命陪分竹
仙資貴珥彤
入辭中殿闕
出貳左廡雄
過楚前封近

前在池州
簽判

還吳舊業空
江山復清思
尊鱸起高

風海濶悲秦望陵荒歎禹功樓澄鑑湖北城險雪濤東
稽壑飛泉石台基下桂叢風流好吟醉王謝有餘宮

送刁景純知越

梅堯臣

前有朱公子後經王右軍至今風俗美自昔誦歌聞秦
望臨丹戟耶谿漱白雲只應絲管去驚動野鷗羣

別耶谿諸叔

趙湘

又散耶谿會斜陽在古原出門逢落葉去路有啼猿短
髮不堪照新詩欲忘論如何為遠別風雪宿孤村

送會稽何從事

王拱辰

行行歧路出塵間，從事猶勝執戟間。
景象徧經江左地，封疆全得浙中山。
侯藩暫列談賓位，綸閣香隨墨客班。
到郡莫為經歲計，詔書非久急徵還。

送裴司門倅越

宋敏求

剡中新佐郡，去路觸炎威。
民富杼機利，地含山水暉。
樵風送舟統，梅雨潤朝衣。
政在宜謠俗，當期奏課歸。

古詩

送孔巢父謝病歸遊江東兼呈李白

杜甫

巢父掉頭不肯往東將入海隨煙霧詩卷長留天
地間釣竿欲拂珊瑚樹

一云三
株樹

深山大澤龍蛇遠

春寒野陰風景暮蓬萊織女迴雲車指點虛無是

征路自是君身有仙骨世人那得知其故惜君只

欲苦死留富貴何如草頭露

一云我欲苦留君富
貴何如草頭易晞露

蔡侯靜者意有餘清夜置酒臨前除罷琴惆悵月

照席幾歲寄我空中書南尋禹穴見李白道甫問

訊今何如一云深山大澤龍蛇遠華繁草青風景暮仙人玉女迴雲車指點虛元引歸路若逢李白

騎鯨魚道甫
問訊今何如

送從弟邕落第後東遊會稽孟浩然

疾風吹輕帆
倏爾向空沒
千里去俄頃
三江坐超忽
向來共懽娛
日夕成楚越
落羽更紛飛
誰能不驚骨

適越留別譙縣張主簿申屠少府

朝乘汴河流
夕次譙縣界
幸因西風吹
得與故人會
君學梅福隱
予隨伯陽邁
別後能相思
浮雲去吳會

別青陽上人遊越

孟郊

秋風吹白髮微宦日蕭索江僧何用歎谿縣饒寂寞楚
思物皆清越山勝非薄時看鏡中月獨向衣上落多謝
入冥鴻笑予在籠鶴

送陸侍御還越

韋應物

居藩久不樂遇子聊一欣英聲頗籍甚交辟迴時珍繡
衣過舊里驄馬輝四鄰敬恭尊郡守牋簡具州民謬忝
誠所媿思懷方見申置榻宿清夜加籩醢良辰遵塗還

盛府行舫遠長津越有賢方伯得此文翰賓

送紀秀才遊越

李白

海水不滿眼觀濤難稀心即知蓬萊石却是巨鼇簪送
爾遊華頂令余發會吟仙人居射的道士住山陰禹穴
尋溪入雲門隔嶺深綠蘿秋月夜相憶在鳴琴

送友人遊越

楚臣傷江楓謝客拾海月懷沙去瀟湘挂席泛溟渤蹇
子訪前跡獨往造窮髮古人即可攀去若浮雲沒願言

弄倒影從此鍊真骨華頂窺絕冥蓬壺望超忽不知青
春度但怪綠芳歇空持釣鼇心從此謝魏闕

送祝八之江東賦得浣紗石

西施越谿女明豔光雲海未入吳王宮殿時浣紗古石
今猶在桃李新開映古查菖蒲猶短未平沙昔時紅粉
照流水今日青苔覆落花君去西秦適東越碧山青江
幾超忽若到天涯思故人浣紗石上窺明月

送謝景初宰餘姚

范仲淹

世德踐甲科

先賓客先紫微俱登甲科廷評今又繼之

青紫信可拾故鄉特

榮耀高門復樹立餘姚二山下東南最名邑煙水萬人
家熙熙自翔集又得賢大夫坐堂恩信數春風為君來
綠波滿平湖乘興訪隱淪今逢賀老無文藻凌雲處定
喜江山助未能同仙舟離樽少留駐行行道不孤明月
相隨去

送陳和叔越州從事

梅堯臣

母夫人老母兄黜夫人從爾之會稽恐傷爾心不敢泣

春岡細雨聞竹雞時亦藏淚未出臉奈何相與頭項低
誠知就祿非獲已應欲退耕無舊畦

臧子文剡縣主簿

剡谿無淺深歷歷能見底潛鱗莫苦窺塵絨聊堪洗古
木潭上陰遺祠巖下啟應識道傍碑因風奠醪醴

余令之會稽新昌


越舸將渡西陵時臘雪欲作陰雲垂古岸潮迴夜水閣
水上鯉魚紅尾鬣知君奉親聊自得窮冬涉險仍熙熙

縣民但可觀此意休羨江邊孝女碑

送張尊師監龍瑞宮

齊唐

陽明洞天三月春桃花豔豔迎笑人
仙官瑤裾翠羽裙
直上非煙驟紫麟手把赤書秘玉文
朝謁太素三元君
琳房窈窕出青雲衆真嘯語林際聞
山精木魅知有主
斂戢鬼火摧颺輪崇巖絕壑足清放
抗跡萬里無埃塵
物不疵癘年穀熟綽約曾潛姑射神
祈師努力學此道
下濟澤國窮鰥民



會稽掇英總集卷十一

欽定四庫全書

集部

會稽擬英總集卷

詳校官中書臣張經田

助教臣常循覆勘

總校官庶吉士臣倉聖脉

校對官中書臣田尹衡

謄錄監生臣龐兆懋

欽定四庫全書

會稽掇英總集卷十三

宋 孔延之 撰

戲樂天復言

望市樓蘇之勝地

元稹

樂事難逢歲易徂
白頭光景莫全孤
弄潮船更曾觀否
望市樓還有會無
眼力少將尋案牘
心情且強擲臬盧
孫園虎寺隨宜看
不必遙遙羨鏡湖

寄浙東韓又評事

杜牧

一笑五雲巖上舟，跳丸日月十經秋。
髮衰漚沫欲誰泥，跡辱魂慙好自尤。
夢寐幾迷胡蝶蝶，文章應廣畔牢愁。
無窮塵土無聊事，不得清言解不休。

寄靜虛二上人

皇甫冉

高人本姓竺，開士舊名林。
一入雪山裏，千秋不可尋。
新年芳草徧，終日白雲深。
欲徇微官去，懸知訝此心。

賈侍御自會稽使迴，余有挂冠之期，因成十韻。

劉長卿

江上逢星使南來自會稽
驚年一葉落按俗五花嘶
上國悲蕪梗中原動鼓鞀
報恩看鐵劍銜命出金闥
風物催歸緒雲峯發詠題
天長百越外湖上小江西
烏道通閩嶺山光落剡溪
暮帆千里思秋夜一猿啼
柏署榮新寵桃源憶故蹊
若為能早去行復草萋萋

晚行次苦竹館却憶于越舊遊

劉長卿

疋馬風塵色千峰且暮時
遙看落日盡獨向遠山遲
故驛花臨道荒村竹映籬
誰憐却迴首步步戀南枝

泛太湖書事寄微之 白居易

煙渚雲帆處處通，飄然舟似入虛空。
玉杯淺酌巡初市，金管徐吹曲未終。
黃夾纈林寒有葉，碧琉璃水淨無風。
避旗飛鷺翩翩白，驚鼓跳魚撥刺紅。
澗雪壓多松偃蹇，巖泉滴久石玲瓏。
書為故事留湖上，所見勝景多記在湖中石上吟
作新詩寄浙東軍府威容從道盛。
江山氣色定知同，報君一事君應羨。
五宿澄波皓月中。

郡中間獨寄微之及崔湖州 白居易

少年賓旅非吾輩
晚歲簪纓束我身
酒散更無同宿客
詩成長作獨吟人
蘋洲會面知何日
鏡水離心又一春
兩處也應相憶在
官高年長少情親

得湖州崔十八使君書喜與杭越鄰郡因成長
句代賀兼寄微之 白居易

三郡何因此結緣
貞元科第忝同年
故情歡喜開書後
舊事思量在眼前
越國封疆吞碧海
杭城樓閣入青煙
吳興卑小君應屈
為是蓬萊最後仙

貞元初同登科
崔君名最在後當時

崔自詠云人間不會雲
間事應笑蓬萊最後仙

張十八員外以新詩二十五首見寄郡樓月下

吟翫通夕因題卷後封寄微之

白居易

秦城南省清秋夜江郡東樓明月時
去我三千六百里
得君二十五篇詩
陽春曲調高難和
淡水交情老始知
坐到天明吟未足
重封轉寄與微之

答微之詠懷見寄

白居易

閣中同直前春事船裏相逢昨日情
分袂二年勞夢寐

並牀三宿話平生紫微北畔辭宮闕滄海西頭對郡城
聚散窮通何足道醉來一曲放歌行

秋寄微之十二韻白居易

娃館松江北稽城浙水東屈君為長吏伴我作衰翁旌
旆知非遠煙雲望不通忙多對酒榼興少閱詩筒比在杭州

兩浙唱和詩贈答於筒中遞來往淡白秋來日疎涼雨後風餘霞數片

綺新月一張弓影滿衰桐樹香凋晚蕙叢饑啼舂穀鳥
寒怨絡絲蟲覽鏡頭雖白聽歌耳未聾老愁從自遣醉

笑與誰后清旦方堆案黃昏如退公口悵卓著景鉅在
兩衙中

仲夏齋居偶題八韻寄微之及崔湖州白居易

腥血與葷蔬停來一月餘肌膚雖瘦損方寸甚清虛體
健通宵坐頭慵隔日梳眼前無俗物身外即僧居水榭
風來遠松廊雨過初褰簾放巢鷺投食施池魚久別閒
遊伴頻勞問疾書不知湖與越吏隱興何如

九日寄微之白居易

眼暗頭風事事妨
遠籬新菊為誰黃
閒遊日久心慵倦
痛飲年深肺損傷
吳郡兩迴逢九月
越州四度見重陽
怕飛杯酒多分數
厭聽笙歌舊曲章
蟋蟀聲寒初過雨
茱萸色淺未經霜
去秋共數登高會
又被今年減一場
重題小舫贈周從事
兼戲微之
白居易

細蓬青篾織魚鱗
小眼紅窓側麴塵
濶狹纔容從事座
高低恰稱使君身
舞筵須揀腰輕女
仙棹難勝骨重人
不似鏡湖廉使出
高檣大舫鬧驚春

早春西沽閑遊惟見興情懷身後之同輩因思

在越官重事殷鏡湖之遊或恐未暇偶成十八

韻寄微之白居易

上馬復呼賓湖邊景氣新管絃三數事騎從十餘人立
換登山屐行攜漉酒巾逢花看當妓遇草坐為茵西日
籠黃柳東風蕩白蘋小橋裝鴈齒輕浪甃魚鱗畫舫牽
徐轉銀船酌慢巡野情遺世累醉態任天真彼此年將
老平生分最親高天從所願遠地得為鄰雲樹分三驛

煙波限一津翻嗟寸步隔却厭尺書頻浙右稱雄鎮山
陰委重臣貴垂長紫綬榮駕大朱輪出動刀槍隊歸生
道路塵鴈驚弓易散鷗怕鼓難馴百吏瞻相面千夫捧
擁身自然間興少應負鏡湖春

寄別微之白居易

憑仗江波寄一辭不須惆悵報微之猶勝往歲峽中別
灑灑堆邊招手時

醜杭州白使君兼寄浙東元大夫

張籍

相印暫辭臨遠鎮披垣出守復同時一行已作三年別
兩處空傳七字詩越地江山應共見秦天風月不相知
人間聚散真難料莫歎平生信所之

壽浙東元尚書見寄綾素

張籍

越地繒紗紋樣新遠封來寄學曹人便令裁製為時服
頃覺光榮在病身應念此官同棄置獨能相賀更殷勤
三千里外無由見海上東風又一春

歸桐廬舊居寄嚴長史

章八元

昨辭夫子棹歸舟家在桐廬憶舊丘三徑暖時花競發
兩谿分處水爭流近聞江老傳鄉語遙見家山減旅愁
或在醉中逢雪夜懷賢應向剡川遊

越中贈程先生

僧法振

紗帽度殘春虛舟寄一身溪邊逢越女花裏問秦人古
塞連山靜陰霞落海新有時城郭去暗與酒家親

贈越僧

溫廷筠

蘭亭舊都講今日意如何有樹開深院無塵到淺沙僧

居隨處好人，事出門多不及。新春鳥年年，鏡水波

贈越僧岳雲

温廷筠

世機銷已盡，巾屨亦飄然。一室故山月，滿鉢秋澗泉。禪
庵過微雪，鄉寺隔雲煙。應共白蓮客，相期松桂前。

贈雲門邕上人

皇甫曾

春山唯一室，獨坐草萋萋。身寂心成道，花開鳥自啼。細
泉松逕裏，返景竹林西。晚與門人別，依依出虎谿。

贈會稽張少府

方干

高節何曾似任官
藥苗香潔備常餐
一分酒戶添猶得
五字詩名隱即難
笑我無謀生鶴髮
知君有意在漁竿
明年莫便還家去
鏡裏雲山且共看

思越中舊遊寄友

方干

向外山川無越國
依稀只似劍門西
鏡中疊浪搖星斗
城上繁花咽鼓鞀
斷臂青猿啼玉笥
成行白鳥下耶溪
此中曾是同遊處
迢遞尋君夢不迷

春晚寄鍾尚書

羅隱

宰府初開奉末塵四年詔笑隄通津官資昔便於中路
酒盞還應憶故人江畔舊遊秦望月檻前公事鏡湖春
如今莫問西禪塢一炷寒香老病身

寄題方干處士鏡湖別墅

鄭谷

山雪照湖水漾舟湖畔歸松篁調遠瀨臺榭發清輝野
岫分開徑漁家並掩扉暮年詩力老新句更幽微

訓浙東李侍郎越州春晚即事長句

劉禹錫

越中藹藹繁華地秦望峰前禹穴西湖草初生邊鴈去

山花半謝杜鵑啼青油畫卷臨高閣紅旆晴翻繞古堤

明日漢庭徵舊德老人爭出若耶溪

後漢劉寵為會稽大治及徵還山陰

縣有五六老叟自若耶山谷間出人齋百錢以送寵寵勞之荅曰自明府下車民不見吏年老遇真聖明故奉送寵為人選一大錢受之

贈致仕滕庶子先輩時及第之中最久劉禹錫

朝服歸來畫錦榮登科記上更無兄壽觴每使曾孫獻
勝境長攜衆妓行矍鑠據鞍能騁健慙把酒尚多情
凌寒却向山陰去衣繡郎君雪裏迎

早行寄朱放山人

龔詩作

山曉旅人去天高秋氣悲
明河川上沒芳草露中衰
此別又萬里少年能幾時
心知剡溪路聊且寄前期

訓皇甫冉西陵見寄

廖融

西陵潮已滿島嶼沒中流
越客依風水相看南渡頭
寒光生極浦暮雪映滄洲
何事揚帆去空驚海上鷗

久滯越中貽謝南池嵇少府

孟浩然

陳平無產業尼父倦東西
負郭昔云鑿問津今亦迷
未

能忘魏闕空此滯秦稽兩見夏雲起再聞春鳥啼懷山
梅福市訪舊若耶溪聖主賢為寶卿何隱適栖

留題越州石氏山齋

晏殊

書仙十閣壯儒宮靈越山川寶勢雄岫柏亞香侵几席
巖花迴影入簾櫳千秋碧鎖東南竹一水清含旦暮風
文酒雅宜頻讌集謝家蘭玉有新叢

贈會稽道士

晏殊

藐姑容化三陰館句漏砂封六乙泥五練夜窮青玉枕

七明晨採碧雲梯冠霞高把浮丘袂握體深藏鬼谷奚
知有山西駐齡藥何妨相贈一刀圭

寄會稽仲休山人

潘閔

近攜琴鶴遊東越曾接談諧氣味深佛意已知師達了
儒書却為俗披尋稽山有雪寒凝骨鑑水無風冷徹心
別後相思向誰說祇應霜鬢暗相侵

寄毛都官

張伯玉

寄問副車毛國鎮別來風味久如何蓬萊閣上誰同飲

宛委山前幾番歌番去聲應向蘭亭搗彩筆曾教西子畫
清蛾若還問我今何似比著前春醉更多

送花趙提刑張伯玉

蓬萊閣下牡丹開盡日凭欄望外臺不敢登門謁樽酒
且教山僕送花來

寄會稽刁景純學士張伯玉

雨後稽山紫翠毫使君千騎壓雲鬣樓臺日暖花木麗
河漢夜涼絲竹高瀛館久淹騏驎足越人今識鳳凰毛

江南老守思離閣
夢想時過白鷺濤

和國鎮晚秋齋中見寄

張伯玉

越國風光與衆殊
貳車才調世應無
晴樓對酌雲平海
夜榻分題月滿湖
吟嘯江山君好手
主張詩酒我非夫
行當乞挂朱輪去
別作香山九老圖

寄五峯諫長老

唐詢

禪客居山患不深
五峰幽絕杳難尋
門前流水朝還暮
堂下閒雲古復今
月色有時依晏坐
秋聲隨處伴謳吟

期師便作終焉計忍負平生物外心

題會稽谿口躬師上人房唐詢

谿口相傳地最靈其間風物與人清
鐘聲夜到江頭盡雲氣朝從檻外生
幾幅輕綃供畫筆一林脩竹寄閒情
閉門終日無塵事卧看南窓自晦明

題會稽谿口躬師上人房施昌言

谿口佳山水高人住此中生臺下沙鳥
踈磬逐江風倚檻千巖寂焚香萬法空
如何憑小筆一為寫衰翁

覽越僧詩集有寄

金

莫學江淹擬惠休碧雲才調已難疇懷君只有關山夢
開卷如逢水石秋不得歸來作都講自慙名宦正悠悠

寄成都蔣密學

向傳式

欽聞宥密綴榮班西顧分憂輟鉅賢乍領蜀都新印綬
應懷越國舊風煙流觴雅趣人多羨正俗佳名世永傳

此一聯叙聖主倚毗間未得重來遊賞是何年

聞拜命
之後欲

渡江一遊尋以促權西
行不果至越故有是句

寄雲門運禪師

顏復

句谿曲曲剡山重誰訪桑門物外蹤
超世有言皆實際示人無意在機鋒
平生懷抱佳高遊壯歲衣冠鏢俗容
每想清禪心暫寂秋聲蕭瑟夜菴松

還舊園作贈顏范二中書

即始寧之園

謝靈運

辭滿豈多秩謝病不待年
偶與張邴合久欲還東山
聖靈昔迴眷微尚不及宣
何意衝飈激烈火縱炎煙
焚玉發崑崙峰餘燎遂見遷
投沙理既迫如邛願亦愆
長與歡

愛別永絕平生緣浮舟千仞壑撻轡萬尋巖流沫不足
險石林豈為難閩中安可處日夜念歸旋事蹟兩如直
心慙三避賢託身青雲上栖巖挹飛泉盛明盪氛昏貞
休康迳遭殊方咸成貸微物豫采甄感深操不固質弱
易扳纏曾是反昔園語往實款然襄基即先築故池不
更穿果木有舊行壤石無遠延雖非休憩地聊取永日
間衛生自有經息陰謝所牽夫子照情素探懷授往篇

和顏延年

弱植慕端操窘步懼先迷寡立非擇方刻意藉窮棲伊
昔造多幸秉筆侍兩闈雖傳丹牘施未謂玄素睽徒遭
良時詆王道奄昏霾人神幽明絕朋好雲雨乖弔屈汀
洲浦謁帝蒼山蹊倚巖聽緒風攀林結留萋跂予間衡
嶠曷月瞻秦稽皇聖昭天德豐澤振沈泥惜無雀雉化
何用充海淮去國還故里幽門樹蓬藜采茨葺昔宇翦
棘開舊畦物謝時既晏年往志不偕親仁敷情昵興玩
究辭悽芬馥敬蘭若清越奪琳珪盡言非報章聊用布

所懷

初發疆中作與從弟惠連

謝靈運

杪秋尋遠山山遠行不近與子別山阿含酸赴脩畛中
流袂就判欲去情不忍顧望脰未恟汀曲舟已隱隱汀
絕望舟驚棹逐驚流欲抑一生歡并奔千里游日落當
棲薄繫纜臨江樓豈惟夕情斂憶爾共淹留淹留昔時
歡復增今日歎茲情已分慮况乃協悲端秋泉鳴北澗
哀猿響南巒戚戚新別心悽悽久念攢攢念攻別心旦

發青谿陰暝投剡中宿明登天姥岑高高入雲霓還期
那可尋儻遇浮丘公長絕子徽音

西陵遇風獻康樂

謝惠連

我行指孟春春仲尚未發趣途遠有期念離情無歇成
裝候良辰漾舟陶嘉月瞻塗意少悰還顧情多闕哲兄
感此別相送越垞林飲餞野亭館分袂澄湖陰悽悽留
子言眷眷浮客心迴塘隱艫棹遠望絕形音靡靡即長
路戚戚抱遙悲遙但自弭路長當問誰行行道轉遠

去去情彌遲，昨發浦陽汭。今宿浙江湄，屯雲蔽層嶺。驚風涌飛流，零雨潤墳澤。落雪灑林丘，浮氛晦崖巖。積素惑原疇，曲汜薄停旅。通川絕行舟，臨津不得濟。佇楫阻風波，蕭條洲渚際。氣色少諧和，西矚興游歎。東睇起淒歌，積憤成疾疴。無萱將如何。

酬從弟惠連

謝靈運

寢瘵謝人徒，滅迹入雲峰。巖壑寓耳目，歡愛隔音容。永絕賞心望，長懷莫與同。未路值令弟，開顏披心胸。心骨

既云披意得咸在斯陵澗尋我室散帙問所知夕慮曉
月流朝忌曛日馳悟對無厭歇聚散成分離分離別西
川迴景歸東山別時悲已甚別後情更延傾想遲嘉音
果枉濟江篇辛勤風波事款曲洲渚言洲渚既淹時風
波子行遲務協華京想詎存空谷期猶復惠來章祇足
攪余思儻若果歸言共陶暮春時暮春雖未交仲春善
遊遨山桃發紅萼野蕨漸紫莖嚶鳴已悅豫幽居猶鬱
陶夢寐佇歸舟釋我吝與勞

酬集賢劉郎中對月見寄兼懷元浙東白居易

月在洛陽天天高淨如水下有白頭人擘衣中夜起思
遠鏡亭上光深書殿裏渺然三處心相去各千里

越中逢天台太子孟浩然

仙穴逢羽人停壚向前拜問余涉風水何事一作處遠行

邁登陸尋天台順流下吳會茲山夙所尚安得聞靈怪

上逼一作通青天高俯臨滄海大鷄鳴見日出每與神仙

會來去赤城中逍遙白雲外莓苔異人間瀑布作空界

福庭長不死華頂舊稱最永懷從此遊何當濟所屆

發越州赴潤州使院留別鮑侍御六言

劉長卿

對水看山別離孤舟日暮行遲江南江北春草獨向金陵去時

曹娥寄丁元珍

史館王相

谿水渾渾來自北千山挹水清相射山深水急無艇子
欲從故人安可得故人昔日此水上樽酒扁舟慰行役
津亭把酒坐一笑我喜滿顏君動色論新講舊惜未足

落日低回已催客，離心自醉不復飲。
秋果寒花空滿席，今年却坐相逢處。
惆悵難逢別時迹，可憐谿水自南流。
安得谿舟問消息。

贈杜醇

越中處士

史館王相

杜生四五十，孝友稱鄉里。
隱約不外求，耕桑有妻子。
杖藜牧鷄豚，筠筒釣魴鯉。
歲時沽酒歸，亦不乏甘旨。
天涯一柸飯，宿昔相逢喜。
談辭足詩書，篇詠又清泚。
都城聞越客，安居常在耳。
日月未渠央，如何棄予死。
古風久彫

零好學少為已悲哉四明山此士今已矣

寄題上虞蘇簿凝虛館

石延年

越基擅巖壑虛館宅其尤丹甍煜孤飛靈景邈四周山
高晴若陰洞寒夏如秋錦幄檻花發玉環渠水流閒卧
真吏隱乍登迺仙遊居之宜民思無為茲宇羞

再寄雲門運禪師

顏復

雲門山巔椽葉青雲門山脚陰谿鳴山翁毀服悖世榮
大心圓靜無能名松間一飭養槁形石壁幾見秋苔生

愛山不免搜其情綴拾短闕成長行施子傳來竒可驚
爽潤空谷天外聲高風擺蕩疑莖英

會稽掇英總集卷十二

欽定四庫全書

會稽掇英總集卷十三

宋 孔延之 撰

傷越 陸龜蒙

越谿自古好風煙
盜東兵纏已半年
訪戴客愁隨水遠
浣紗人泣共埃捐
臨焦賴灑王師雨
欲墮重登刺史天
早晚山川盡如故
清吟閒上鄂君船

自洛之越 孟浩然

遑遑三十載書劍兩無成山水尋吳越風塵散洛京扁
舟泛湖海長揖謝公卿且樂杯中酒誰論世上名

會二同年白居易

一樽聊接故人歡百歲堪嗟鬢漸殘莫見白雲容易愛
照湖澄碧四明寒

春日思歸王翰

楊柳青青杏發花年光誤客轉思家不知湖上菱歌女
幾箇春舟在若耶

越中攬古 李白

越王勾踐破吳歸義士還家盡錦衣
宮女如花滿春殿
只今唯有鷓鴣飛

越谿怨 後朝光

越王宮裏如花人
越水谿頭採白蘋
白蘋未盡人先盡
誰見江南春復春

越中言事

咸通八年瑯琊公到任後作 方干

異術閑和合聖明
湖光浩氣共澄清
郭中雲吐啼猿上

山上花藏諶角坊香起荷澗傳棹飲絲垂柳陌約鞭行
遊人今日又明日不覺鏡中新髮生

其二

雲霞水木共蒼蒼元化分功秀一方百里湖波輕撼月
五更軍角慢吹霜沙邊賈客喧魚市島上潛夫醉筍莊
終歲逍遙仁術內無名甘老買臣鄉

南游感興

寶鞏

傷心欲問前朝事唯見江流去不迴日暮東風春草綠

鷓鴣飛上越王臺

懷會稽錢昭度

斗牛星外翻成夢
巢鳥枝南略寄身
越國荷花八百里
別來誰是採蓮人

憶越州 陳堯佐

越絕谿山第一州
畫圖城郭幾淹留
閒思禹廟斜回首
髣髴雲端見郡樓

悼賢詩 并序 劉彝

越州剡縣超化院皇祐辛卯春予寄居是邑民方阻饑
流莩千里集於城下縣令祕丞過公彥專勸誘豪族得
米二萬斛以救民明年又饑遂出常平錢萬緡請糶於
明歸以剡價中官取其贏米幾萬斛繼續民今尚憚其
不給也乃刻俸麥七十斛為種而假超化院左僧民之
田十餘頃役饑民耕種之明年得大麥五百餘斛嗣給
流民各俾歸業熙寧己酉春余倅永嘉就移湖北道出
剡谿民有懷過公者尚皆感泣而院僧聞其云亡尤增

痛悼因書屋壁繼以詩

良疇十頃接晴煙，曾假過侯救旱年。
俸麥一車開德濟，流民千里荷生全。
嗟逝水今亡已，俗感遺風尚泫然。
獨對老僧談舊事，斜陽春色漫盈川。

越谿懷儼老

蘇舜欽

擊檣轉山曲，雲間谿更深。
鳧鷗帶波起，藻荇共魚沈。
上國久離意，故人相念心。
天涯逢絕景，不得對清吟。

越中懷古

魏庭堅

句無亭下駐驂駢鑑水寒光照客衣張翠鄂君舟上去
浣紗西子網中歸禹祠草樹空春色秦望風煙半夕暉
王謝勝遊何處問茂林脩竹尚依依

墨池懷古

楊蟠

書畫嘗聞晉右軍當時深遁樂天真空山寂寞人何在
一水泓澄墨尚新靈運也思輕印綬季鷹還解憶鱸蓴
高風夙古應相照共是知幾此避身

憶越

楊蟠

蓬萊閣面對青山上遊人半是仙
漁浦夕陽橫掛雨
鑑湖春浪倒垂天
高城尚鎖當時月
故殿空留幾處煙
長愛剡谿堪乘興
雪中曾棹子猷船

過始寧故墟

謝靈運

東髮懷耿介
逐物遂推遷
違志似如昨
二紀及茲年
緇磷謝清曠
疲繭慙貞堅
拙疾相倚薄
還得靜者便
剖竹守滄海
枉帆過舊山
山行窮登頓
水涉盡洄沿
巖峭嶺稠疊
洲縈渚連緜
白雲抱幽石
綠篠媚清漣
葺宇臨迴

江築觀基曾顛揮手告鄉曲三載期還旋且為樹枌櫨
無令孤願言

往臨川憶始寧山中 謝靈運

采菱調易急江南歌不緩楚人心昔絕越客腸今斷斷
絕雖殊念俱為歸慮款存鄉爾思積憶山我憤懣追尋
栖息時偃卧任縱誕得性非外求自己為誰纂不怨秋
夕長恒苦夏日短濯流激浮湍息陰倚密竿懷故叵新
歡含悲忘春暖悽悽明月吹惻惻廣陵散殷勤訴危柱

慷慨命促管

蘇州李中丞以元日郡齋感懷詩寄微之及子
輒依來篇七言八韻走筆奉答兼呈微之白居易

易

白首餘杭白太守落拓拋名來已久一辭渭北故園春
再把江南新歲酒杯前笑歌徒勉強鏡裏形容漸衰朽
領郡慙當潦倒年鄰州喜得平生友長洲草接松江岬
曲水花連鏡湖口老去還能痛飲無春來曾作閒遊否

憑憑傳語報李六情雁將書與元九莫嗟一日日催人
且貴一年年入手

除官赴關留贈微之

白居易

去年十月半君來過浙東今年五月盡我發向關中兩
鄉默默心相別一水盈盈路不通從此津人應省事寂
寥無復遞詩筒

遣興

杜甫

賀公雅吳語在位常清狂上疏乞骸骨黃冠歸故鄉爽

氣不可致斯人今則亡山陰一茅宇江海日淒涼

壯遊 杜甫

往昔十四五出遊翰墨場斯文崔魏徒

崔鄭州尚魏豫州啓心

以

我似班揚七齡思即壯開口詠鳳凰九齡書大字有作

成一囊性豪業嗜酒嫉惡懷剛腸脫略小時輩結交皆

老蒼飲酣視八極俗物都茫茫東下姑蘇臺已具浮海

航到今有遺恨不得窮扶桑王謝風流遠闔廬丘墓荒

劍池石壁仄長洲荷芰香嵯峨閭門北清廟映迴塘每

趨吳太伯撫事淚浪浪枕戈憶勾踐渡浙想秦皇蒸魚

聞匕首除道哂要章越女天下白鏡湖五月涼剡谿蘊

秀異欲罷不能忘歸帆拂天姥中歲貢舊鄉氣劇屈賈

壘日一作短曹劉牆忤下考功第獨辭京尹堂放蕩齊

趙間裘馬頗清狂春歌叢臺上冬獵青丘旁呼鷹皂一作

紫樾林逐獸雲雪岡射飛曾縱鞚引一作臂落鵝鷓蘓

侯據鞍喜監門曹忽如攜葛強快意八九年西歸到咸

陽許與必辭伯賞一作遊實賢王曳裾置醴地奏賦入

明光天子廢食召羣公會軒裳脫身無所愛痛飲信行

藏黑貂不免敝斑鬢兀稱觴杜曲晚

一云換

耆舊四郊多

白楊坐深鄉黨敬日覺死生忙朱門任

一云務

傾奪赤族

迭罹殃國馬竭粟豆

漢有太常三輔粟豆

官雞輸稻梁舉隅見煩

費引古惜興亡河朔風塵起岷山行幸長兩宮各警蹕

萬里遙相望崆峒殺氣黑少海旌旗黃禹功亦命子豕

鹿親戎行翠華擁英

一云吳

岳螭虎噉豺狼爪牙一不中

胡兵更陸梁大軍載草草凋瘵滿膏肓備負竊補袞憂

憤心飛揚上感九廟焚下憫萬民瘡斯時伏青蒲廷爭
守御床君辱敢愛死赫怒幸無傷聖哲體仁恕宇縣復
小康哭廟灰燼中鼻酸朝未央小臣議論絕老病客殊
方鬱鬱苦不展羽翮困低昂秋風動哀壑碧蕙捐一云損
微芳之推避賞從漁父濯滄浪榮華敵勳業歲暮有嚴
霜吾觀鴟夷子才格出尋常羣兇逆未定側佇英俊翔

還自會稽歌

并序

李賀

庾肩吾於梁時嘗作宮體謠引以應和皇子及國世淪

敗肩吾先潛難會稽後始還家僕意其必有遺文無得
焉故作還自會稽歌以補其悲

野粉椒壁黃濕螢滿梁殿臺城應教人秋衾夢銅輦吳
霜點歸鬢身與塘蒲晚脈脈辭金魚羈臣守迤賤

唐施肩吾仙居有感

陳堯佐

幽居正想餐霞客夜久月寒珠露滴千年獨鶴兩三聲
飛下巖前一枝柏

觀上林埒器

謝景初

作竈長如丘取土深於斬躡輪飛為模覆灰色乃紺力
疲手足病欲憩不敢暫發窰火以堅百裁一二占里中
售高賈鬪合漸收斂持歸示北人難得曾罔念賤用或
棄撲爭乞寧有厭鄙事聖猶能今予乃親覘

寓懷會稽吳道子遇因師

鮑當

隱淪與釋子時予久往還覽照不自認况復思君顏昨
日山書至乃夢雲蘿間何必風韻息始覺萬境閒

覆驗餘姚道中

王存

一夫死非命滌驗更兩吏一囚坐法誅三覆與衆棄去
年交阻敗殺戮無賤貴江淮屢歲青積殍溝壑穢聖人
於赤子愛重若彼至謹小以遺大誰其原帝意

范蠡

陸龜蒙

平吳專越禍胎深豈是功成有去心勾踐不知嫌鳥喙
歸來猶自鑄良金

泊舟苧蘿山際題西施石

王軒

嶺上千峰秀江邊細草春今逢浣紗石不見浣紗人

浣紗石上女

玉面耶溪女青蛾紅粉粧一雙金齒屐兩足白如霜

文種墳

石延年

至忠惜甘死越塞一墳孤勾踐非王者陶朱亦大夫碑
經山燒斷樹帶海潮枯泉下伍負輩相逢相弔無

王右軍

李白

右軍本清真瀟灑在風塵山陰遇羽客要此好鵝賓掃
素寫道經筆精妙入神書罷籠鵝去何曾別主人

越女辭

李白

長手吳兒女，眉目豔星月。
屐上足如霜，不著鴟頭襪。

其二

吳兒多白皙，好為蕩舟劇。
賣眼擲春心，折花調行客。

其三

耶溪採蓮女，見客棹歌迴。
笑入荷花去，佯羞不出來。

其四

東陽素足女，會稽素舸郎。
相看月未墮，白地斷肝腸。

其五

鏡湖水如月
耶溪女如雪
新粧蕩新波
光景兩奇絕

西施
李白

西施越溪女
出自苧蘿山
秀色掩今古
荷花羞玉顏
浣紗弄碧水
自與清波閒
皓齒信難開
沈吟碧雲間
勾踐徵絕豔
揚蛾入吳關
提攜館娃宮
杳渺詎可攀
一破夫差國
千秋竟不還

經西施浣紗石
胡幽貞

徘徊浣紗石想像浣紗人碧水澄不流紅顏照之頻自
惜絕世姿豈與衆女隣一朝入紫宮萬古留芳塵至今
谿邊花不敢嬌青春

越女辭

鮑溶

越女芙蓉衣浣紗清淺水心驚春色晚不敢思君子君
子縱我思寧來遠溪裏

越谿女

于濇

會稽山上雲化作越谿人未破吳王國徒為西子身江

邊浣紗伴還金扼雙腕儵忽不相期恩傾趙飛鸞妾家
基業薄空有如花面嫁盡綠窻人猶自盤金線

西施詠

王維

豔色天下重西施寧久微朝為越谿女暮作吳宮妃賤
日豈殊衆貴來方悟稀邀人傳脂粉不自著羅衣君寵
益嬌恣君憐無是非當時浣紗伴莫得同車歸持謝隣
家子毀顰安可希

弔王右軍宅文

并序 錢公輔

晉王右軍宅于越之載山今為浮圖而繪像存焉好事者猶能指墨池鵝池之遺迹而表識其上子嘗恨東南山之佳水之勝多奪於浮圖氏而衣冠隱淪無一人得之者既過右軍宅擲文以弔之曰

晉去今兮千齡未餘彼山峩兮晉賢人之故居故居泯其幾時兮今變化於浮圖嗚呼傷哉絕雲巍崗蔥蔥蒼蒼竹茂草美煙高氣長古松翁兮虬盤怪石呀兮虎驤前稽嶺之橫峙兮下鑑水之輝光遠市井之喧卑兮據

城壘之低昂春可遊而縱望兮夏可息而淒涼秋可登
而感槩兮冬可處而樂康無一時之不得宜兮環一目
而周四方真孤高之所廬兮非醜族之能當生宜形體
之放浪兮死宜魂魄之棲藏嗚呼傷哉彼靈何之兮默
不聞一怪與一祥果無知兮徒結塞予之中腸果有知
兮奚坐視緇徒之賊戕將後葉之湮淪兮無能振其祖
芳抑亂離之荐遭兮百易主而百亡吾固弗得而知兮
茲涕泗而倘佯嗟道之衰兮異類蠹侵而日昌嗟越之


雄兮豈微一丈夫之勇剛如可贖兮雖萬金可捐萬室
可償胡怙夷而莫醜兮往往助資棟梁聊指文於山之
側兮將鑿石乎州之堂嗟嗟越人窮千萬春兮吾文之
弗忘

讀漢書梅子真傳

梅堯臣

子真實吾祖耿介事炎漢權臣始擅朝忠良被塗炭羣
下莫敢言上書陳治亂是時卿大夫曾不負愧汗其文
信雄深爛然今可翫危言識禍機滅跡思汗漫一朝棄

妻子龍性寧羈紉九江傳神仙會稽隱塵辟舊市越谿
陰家山鏡湖畔唯餘千載名撫卷一長歎



會稽掇英總集卷十三